

**Akiitsunut aningaasaliinissamullu pilersaarutit naapertorlugit Tasiilami mittarfiliornissamut periarfissaqarsinnaaneranut atatillugu misissueqqaarnerit tullianilu businesscase aallarteqqullugit Naalakkersuisut peqquneqarnissaannik Inatsisartut aalajangiiffigisaattut siunnersuut. Misissueqqaarnerit naammassineqareersimassapput ukiumi aningaasaliiffiusuni 2015-mi timmisartunut suluusalinnut mittarfiliornerup pilersaarusi-  
ornera aallartinneqarsinnaaqqullugu**

(Andreas Uldum, Demokraatit)

### **Akissuteqaat**

(Peqqissutsimut Attaveqarnermullu Naalakkersuisoq)

### **Aappassaaneerinnineq**

Aalajangiiffigisassatut siunnersuutip sukumiilluinnartumik oqaluuserineqarsimaneranut ataatsimiititaliaq qutsavigerusuppara.

Mittarfeqarnermut tunngasuni immikkoortunut pilersaarutip siunertaraa silaannakkut angallassinerup ilusilersugaanerata aamma mittarfeqarnerup ilusilersugaanerata, tamatumunngataaq ilanngullugu siunissami sanaartugassanut aningaasaliissutit pingaarnersiulluni tulleriarneqarnissaasa ataatsimoortumik pilersaarusiortifigineqarnissaat.

Taamaattumik Tasiilami mittarfiliornissamut misissueqqissaarnissamik suliaqarnissap akuersissutigineqarnissaa pissusissamisuussanngilaq, taamatut pingaarnersiulluni tulleriarineq aatsaat aalajangerneqarsinnaammat immikkoortunut pilersaarusiortineq piulereerpat. Tamatumuunakkut qulakkeerneqassaaq immikkoortitsilluni aalajangiisoqannginnissaa, nunamili tamarmiusumi pisariaqartitsineq naapertorlugu aalajangiisoqassalluni.

Tamanna tunuliaqutaralugu ataatsimiititaliami ikinnerussuteqartut siunnersuutaat Naalakkersuisut tapersorsorinnaanngilaat, qujarutigaluguli ataatsimiititaliami amerlanerussuteqartut siunnersuutip itigartitsissutigineqarnissaannik Naalakkersuisut tapersermatigik.